

12 OCT 1998

RAJA SWAZILAND DIBERI SAMBUTAN RASMI

KUALA LUMPUR, 12 Okt (Bernama) -- Yang di-Pertuan Agong Tuanku Ja'afar dan Raja Permaisuri Agong Tuanku Najihah hari ini menyambut ketibaan Raja Mswati III dan Permaisuri Inkhosikati LaNgangaza dari Swaziland secara rasmi di Dataran Parlimen di sini.

Raja Mswati III tiba di sini semalam untuk lawatan negara selama enam hari.

Ketibaan baginda disambut dengan tembakan meriam 21 das dan diiringi dengan lagu kebangsaan kedua-dua negara, yang dimainkan oleh Pancaragam Pusat Rejimen Askar Melayu Diraja.

Baginda turut memeriksa barisan kehormat Batalion Pertama Rejimen Askar Melayu Diraja, yang dianggotai empat pegawai dan 103 anggota diketuai oleh Mejar Romainor Mohamed. Baginda kemudiannya diperkenalkan kepada Perdana Menteri Datuk Seri Dr Mahathir Mohamad serta para anggota Kabinet.

Raja Mswati III akan menerima menghadap Dr Mahathir tengah hari ini sebelum mengadakan pertemuan secara rasmi dengan Perdana Menteri di Jabatan Perdana Menteri dan menghadiri jamuan negara di Istana Negara malam ini.

Sepanjang berada di sini, Raja Mswati III akan melawat Menara Berkembar Petronas, Koridor Raya Multimedia, beberapa agensi pertanian dan pembangunan negara serta melawat negeri Melaka.

-- BERNAMA

HJ RI